

FORUM

www.forumtydskrif.co.za | Julie 2021

AfriForum Tydskrif



JAAR

#StaanSaam #SkepHoop #VegEnBou

ISSN 2313-1144



9 772313 114002

R15,95 (BTW ING.)
Gratis aan lede

#AfriForum15

Kallie Kriel – uitvoerende hoof van AfriForum

AfriForum het 15 jaar gelede sy eerste openbare verskyning gemaak in 'n artikel wat op 26 Maart 2006 in *Rapport* gepubliseer is oor die stigting van 'n nuwe Afrikaanse organisasie genaamd AfriForum. Die gesoute joernalis wyle ZB du Toit het dié geskiedkundige artikel geskryf.

Ek onthou nog dat ZB in sy vooraf gesprek met my genoem het dat hy dink AfriForum 'n wesenlike rol sal kan speel as die organisasie oor 10 000 lede beskik. Dié organisasie het natuurlik met sy stigting geen lede gehad nie, met 'n personeelkorps van slegs drie (ekself, Alana Bailey en Annatjie Wirth) gespog en oor beperkte hulpbronne beskik.

Hoewel ons drie vasberade was om 'n suksesvolle organisasie te bou, het AfriForum se groei en suksesse die afgelope 15 jaar ons stoutste verwagtinge ver oortref.

Vandag kyk AfriForum met dankbaarheid terug na die talle suksesse wat dié organisasie die afgelope 15 jaar met genade van Bo en die ondersteuning van duisende lede op internasionale, nasionale en plaaslike vlak behaal het.

Ons is ook trots daarop dat AfriForum se aktiewe ledetal pas die 285 000-kerf verbygesteek het. AfriForum beskik tans oor meer as 180 personeellede en 'n verdere 100 uitgekontraakteerde diensleweraars. Ons het 159 buurtwagte en 156 takke landwyd. Meer as 12 500 vrywilligers vorm ook die hart van AfriForum se aktiwiteite op plaaslike vlak.

Al bogenoemde suksesse is natuurlik nie die werk van enkelinge nie, maar 'n spanpoging waarin elkeen van AfriForum se meer as 285 000 lede 'n sleutelrol gespeel het en steeds speel. Dit is ons lede wat AfriForum sterk maak. Sonder lede is AfriForum niks.

Ons is ook dankbaar teenoor God vir die genade dat AfriForum tot dusver kon regkry wat menslik gesproke onmoontlik gelyk het. Ook AfriForum se direksie, personeel en plaaslike leiers se roepingsgedrewe harde werk speel 'n sleutelrol in ons sukses.

AfriForum sien uit na die volgende 15 jaar, waarin ons saam met die

Solidariteit Beweging sal voortgaan om ons driebeensuksesresep aan te wend om 'n toekoms te bou waarin ons en ons nageslag blywend vry, veilig en voorspoedig kan voortbestaan aan die suidpunt van Afrika. Hierdie driebeensuksesresep behels die volgende: 1. Ons word gedryf deur ons roeping om 'n beter toekoms te skep (#AfriForumSkepToekoms); 2. Ons werk volgens 'n praktiese uitvoerbare veg-en-bou-plan (#AfriForumVegEnBou); en 3. Ons beskik oor die uitvoerende vermoë om die plan te kan uitvoer (#AfriForumKan).

Roeping is AfriForum se “geheime wapen”, aangesien die wete dat jy aan iets groter as net jouself werk, dit vir gewone mense soos ons moontlik maak om in moeilike omstandighede

“

Ons is ook dankbaar teenoor God vir die genade dat AfriForum tot dusver kon regkry wat menslik gesproke onmoontlik gelyk het.

buitengewone suksesse te behaal.

Die **veg-en-bou-plan** behels kortliks dat AfriForum vir geregtigheid en téén agteruitgang veg, en dat ons terselfdertyd praktiese op voetsoolvlak alternatiewe werklikhede bou wat dit vir ons gemeenskap moontlik maak om met 'n groeiende mate van selfstandigheid en selfbestuur na ons eie belange om te sien.

Indien AfriForum nie oor die **uitvoerende vermoë** beskik om bogenoemde plan uit te voer nie, sal ons goeie plan net 'n nuttelose oefening in kreatiewe skryfwerk wees. AfriForum se meer as 285 000 lede bring 'n groter uitvoerende vermoë teweeg as waaroor enige ander burgerregteorganisasie in die Suidelike Halfrond beskik.

Hoewel AfriForum baie trots is op wat die afgelope 15 jaar bereik



is, besef ons in nederigheid dat daar nog baie is wat gedoen moet word. Ons voorgeslagte het telkens groot uitdagings oorkom en ons sal dit weer regkry. In dié verband bied AfriForum en die Solidariteit Beweging se gevorderde planne om sterk selfstandige ankergemeenskappe te help skep, waarin ons gemeenskappe hulle toekoms in hul eie hande neem, hoop vir die toekoms. AfriForum se planne vir groeiende outonomie vir die Wes-Kaap bied ook opwindende moontlikhede.

Ons kan dus, ten spyte van die regering se wanbestuur en korrupsie, self 'n beter toekoms bou. Die Solidariteit Beweging se nuwe Sol-Tech-kampus, die graadkursusse wat Akademia aanbied, AfriForum se nuwe teater en AfriForum se 159 buurtwagte en 156 plaaslike takke se selfdoenprojekte is maar enkele van die lewende selfdoenmonumente wat bewys dat selfstandigheid nie 'n dagdroom is nie.

Dankie aan AfriForum-lede wat hierdie selfstandigheid deurlopend help uitbou en daarmee bewys dat daar hoop vir die toekoms is.

#MyVuurwapensMyne

Een van die grootste uitdagings in AfriForum se 15-jarige bestaan is die huidige hernieude pogings van die owerheid om wettige vuurwapeneienaars se selfverdedigingswapens te onteien. Hiervoor sê AfriForum hard en duidelik néé! Juis daarom gaan AfriForum die ANC-regering se ontwapeningsplanne beveg met alles wat ons het.

Wat my persoonlik betref het ek 'n beginselbesluit geneem dat ek nooit my selfverdedigingswapen sal inhandig nie. As ek moet kies tussen die vermoë om my gesin te kan beskerm of onderdanigheid aan 'n owerheid wat nie sy burgers kan beskerm nie, kies ek my gesin.